

## Kellermeisteren.

Kessel/ vnd seigs durch ein Tuch in das Faß also warm/ Der Wein sol aber vor in dē Faß seyn/ vnd laß leer vmb ein zwerch Hand/ anders der Wein stieß dem Faß den Boden auß/ vnd spundt es gar wol zu/ vnd versprengt es hinten vnd vorn/ so wirt der Wein starck im ablassen/ wenn du schon schwachen Wein hast/ vnd den gemachten Wein dieweil behaltest/ so magstu zwey oder drey Fuder damit starck machen/ wenn man ihn darnider zeucht/ vnd derselbig Wein ist gut vnd gesundt zu trincken.

Item/ den Wein/ so du ein tag ablisest vnd auffschüttest zu feltern von stundtan/ so nimb zum ersten ein Lot Eniß/ vnd zwey Lot Zucker Candit/ vñ ein Lot Entian/ vnd ein Lot Johanskraut abgestreiff. Man sol den Entian stossen/ vnd das alles vntereinander thun/ Auch sol man das Faß legen an ein Kule stattt/ vnd die vorgeschriebene Materi in ein grosse Pfann thun/ vnd ein wenig lassen erwarmen/ vnd geuß es in Wein/ vnd spundt das Faß zu/ vnd laß in ligen vier Wochen/ vnd wenn der Wein versucht wirt/ so ist er köstlich vñnd mild/ Biltu ihn zwey Jar also starck vnd gut behalten/ so seude Benfußwurzel mit zwo Maß gutem Wein/ vnd geuß es in den Wein/ das ist gut für alle Gebrächen des Weins.

## Ein guten eyenschlag oder Span köstlich ring zu machen/ der da dienet zu allen Weinen.

Nimb zwey pfundt Schwebel/ vñnd stoß den Schwebel klein in einem Mörser/ vnd thu darnach den Schwebel in einen Hafen/ vñ geuß viel Wasser daran/ vnd laß in sieden auff ein stund/ vnd seige das durch ein klein Sib/ vñnd laß es wider trucken werden/ darnach nimb einen Tigel/ vñnd thu den Schwebel darein/ vnd laß den wider zergehen ob dem Feuer/ biß dz er lauter werde. Darnach zeuch in auff ein grobes leinen Tuch/ vñnd nimb diese hernach geschriebene stück darein.

Item/ ein vierling Eniß/ vier Lot Violwurzel/ die da weiß ist/ zwey Lot Muscatenblüt/ zwey Lot langen Pfeffer/ drey Lot weissen Weihrauch/ ein Lot Mastix/ drey Lot Pariskörner/ vñnd stoß die Species durcheinander/ vnd wenn du den Schwebel zeuhest/ so sträuw die Species auff das Tuch/ so du das auß dem Schwebel zeuhest/ dieweil es noch gar warm ist.

## Ein anders.

Item/ wenn du ein Wein schenckest/ vnd wilt dasz er dir nicht abfallen kan/ so nimb Baumöl/ nach dem das Faß groß ist/ vñnd wenn der Wein so weit leer ist/ dz er beyde Bödem betrifft/ so geuß dz Baumöl hinein/ vnd wenn du weißt/ wie lang du an dem Wein schenckest/ so verleuret er sein Farb nicht/  
vnd